

- تعال العب معنا .. شدتني من إيدي ولفت تكلم ألعابها:

- ده الحمار اللي هيوصلنا للمزرعة

- يلا يا منار عشان تتعشي والعبي بعدين

- لا يا بابا وصلنا للمزرعة الأول أصلنا تايهين والليل قرب يجي

- على آخر الزمن بقيت حمار .. هه لا أبدًا

وشها اتقلب والبوز إياه فكرني بأمها، شاورت على الأرض

- يلا يا حمار ... وصلنا للمزرعة .

وفي لحظة بقيت حيوان من ذوات الأربع بلف بالهانم وصندوق ألعابها الأوضة

- كفاية لف بقى

- لا يا بابا نلعب شوية كمان دول مبسوطين أوي شديتها من دراعها .. كفاية

لازم تتعشي وتنامي

ولسه هتبدأ نوبة عياط مصحوبة بصداع وعكننة:

- لااااا آهي

لقيت كل حاجة بقى لونها أسود في عنيا .. مش يأس دي الكهرا قطعت ولو

يأس كان أرحم لأني بأترعب من الضلمة من صغري لحد الآن.

- إيه اللي حصل يا بابا؟

- الكهرا قطعت يا منار والدنيا ضلمة

- كويس إننا وصلناهم للمزرعة

- ده وقته، تعالي نشوف الشمع فين؟

مسكت إيدها وبدأت أخطي وأنا مرعوب

- مش لاقى شمع..

- فيها إيه لما منلقيش شمع؟

- هنفضل في الضلمة

- وهي الضلمة وحشة يا بابا؟
معرفتش أرد، أخذتها أوضتها، وصلتها للسريير
قلت: هي مش وحشة بس الإنسان فيها عامل زي السفينة اللي تاهت في
البحر بالليل ومفيش منارة تدله على الطريق.
هه هه ضحكت ببراءة: أنا المنارة .
- أيوا إنتي اللي بتنوري الطريق .. خلينا هنا لحد ما الكهربا ترجع
قامت بسرعة .. حاولت ألحقها شلني الخوف جوايا ..
- منار روحتي فين؟
مسمعتش رد لمدة خمس دقائق خوف كأن المفعوصة كانت شغلاني عن كل
خوفي
- أهى يا بابا الشمعة.
- لقتها فين دي؟
- دي شمعة حفلة عيد ميلادي شيلتها علشان بأعد سنين عمري.
- آه فاكرا اليوم ده.
- أنت مكنتش موجود .. كان عندك شغل أخذتها في حضني وبكيت زي العيال
الصغيرة، اتخضت من دموعي بس طبطبت عليًا وهي بتهديني.
- متخفش يا بابا النور زمانه جاي .. وافكرت الملحوظة الأخيرة في الورقة:
(أرجوك عامل منار بطبيعتك وحاول تتجاهل إنها عمياء هتلاقيها طفلة
عادية).